

## Näyte 40: Itkuvirsi evakkoon lähdöstä, sanellen (Suojärvi, Korpiselkä)

A nyt mie rubien isterä naine igävie ilmottelemah  
da surdunut iče suurie suruzie sanelemah  
kun mejän kurjazien pidi jättie kaunehet Karjalan muahuot  
da ylen armahat syndymäseuduzet  
Kaunehet, lämbimät kodizet  
tuntemattomil tulijoil, outoloile eläjil  
Meijän pidi läylemäzien lähtie  
viluzina da viihakkazina talvi-ildasina viereksimäh  
tiehyzil tiettymättömil  
dai dorgazil tundemattomil  
Sinne jäi kai armahat paikkazet  
segä kaunehen Karjalan järvyöt  
läikkyvien vedyzien kera  
segä juokzevat jogivetyöt  
rakkahien randazien da kuohuvien koskien kera  
Sinne jädih armahat kirikközet  
kullalkuuldavin kupolizin da ristazien kera  
Sinne jädih ylen armahat kalmistozet  
kaunehien kuuzikkoloin da armahien haudakumbuzien kera  
Sinne jädih suuret sugukundazet segä heliet heimokundazet  
segä kadalän iččeni kannettuzet  
Nyt miul isteräl ičelläni on ylen suuret igäväzet  
kun en piäze heiän hautakumbusie ni kadajavarbazil kavahuttelemah  
engä kybenyözeni haudakumbusil piäse kyynelvedyzie kylvämäh  
En voi poloni polvistua ristazen juureh itkuvirdyzie virittämäh  
kuldazien kannettuzein kuuldavikse  
Andakkua armahat syndyzet kuldakägözet kuuzikkoh

latvah kukkumah  
 dai piäčköipoigazet ristasien piäl laulamah  
 Anna hyö niitä kuunneldas  
 meidä kurjie vuotelles  
 Onnako nämä on armahien syndyzien azettamat aziehut  
 Meiän kaikkien pidää vain andua  
 tuhannenkerdazet kiitokset pyhil syndyzil kaikesta tästä  
 antua monenkerdazet polvipoklonazet valgein vahatuohuksuzien ker  
 kun parahat syndyzet on annettu armahah izänmuah meilä asuntapaikkazet  
 pidäkkäh oigeil – syndyzil  
 armahien pokoinnikkoin puolesta  
 Andakkah armahat syndyzet heil kaikil  
 valgiet da vaivattomat tilazet elettävikse  
 iloset, ihanan tilaset oldaviksi  
 Ottakkua pyhät olevat syndyzet heidä kaikkie oigiel puolel olijakse  
 dai azetelkua armahat spuassazet heidä Abrahamin asundoh  
 Oi kuldazet kannettuzeni  
 kun kuuletta kuolendaviestisizen segä kallehil ilmazil kadoneheksi  
 Tulgua jo tuonenveräjile tunnustelemah  
 valgein da vahatuohuksuzien ker  
 Ku pyhät syndyzet annettanoo teil  
 ne valgiet valdazet ottakkua minua ykzih  
 arttelisih olemah

### **Metatiedot:**

Tekijä: Haastattelijana AK, haastateltavana ET

Omistaja: Kansanperinteen arkisto

Käyttöehto: Muu käyttöehto: Äänitettä ei saa luovuttaa edelleen, muokata tai äänitteen sisältöä julkaista sitaattioikeutta laajemmassa määrin.

Äänitettä koskevat arkiston käytösäännöt <https://sites.tuni.fi/kansanperinne/tilaukset/arkiston-saannot/>

Ladattavuus: Ei

Lähde: Kansanperinteen arkisto, Tampereen yliopisto, Kper AK/0857\_13